

Ingoa: _____ **Rangi:** ____/____/____

Te Waka a Aoraki

Nā Rewa McConnell

Whatukura

Ko tō tātou whenua, ko Aotearoa, he kāhui moutere.
E rua ngā motu nunui – kei te raki tētahi, kei te tonga tētahi.
Ka kōrero ahau mō te hanganga o te motu nui ki te tonga, i te wā
o ngā atua. Tokowhā o ngā tama a Rangi i whakaaro ki te heke mai
ki te tiroiro. Ko Aoraki te tuakana.

He tini ngā rā me ngā pō i rere ai, engari kīhai i kitea he whenua.
Engari ka pōuri te rangi, ka heke te ua, ka pupuhi te hau. Kātahi ka pā mai
te tūpuhi. Wareware katoa ngā kōrero a te matua i te rangi.
“Whakaorangia tātou e Aoraki!” te tangi a ngā tēina.
“Whakahuatia te karakia whakaaio i te moana kia tae ai tātou ki te kāinga.”

Ka tū a Aoraki, ka karakia. Engari, i te wheoro o te hau, i te patu a te ngaru,
ka ngaro ētahi o ngā kupu karakia, ka whiua te waka a Aoraki ki ngā toka
tū moana. Kore rawa tētahi i aro ake ki ngā kupu a tō rātou matua.

Kāhore te waka i totohu, engari i tahuri tītaha, ko te ihu kei runga ake i ngā
ngaru. Tere tonu te piki atu a ngā hunga nei ki te ihu o te waka, kia puta
atu ai i te wai, ā, ka noho tahi i runga ake i te wai kōriporipo.

Kua mau rātou, ka kōhatu ō rātou tinana, ka hurihia rātou hei maunga
kōhatu teitei. Ko Aoraki te tuakana te maunga tino ikeike, ko ōna tēina ko
ngā maunga iti iho i ōna taha. I pēnei rā te hanganga o Te Waipounamu.